

14

Nº 14. Xunu 2007.

Cartafueyu de Mocedá d'Izquierda Asturiana. www.mias.as

na cai

eleiciones >>

mias>> participó nes candidatures d'UNIDÁ

Mocedá d'Izquierda Asturiana tuvo presente nes eleiciones nacionales y a conceyos del pasáu 27 de mayu n'Asturies al traviés de la coalición **Unidá**, na que tuvo enxertu'l partíu **Izquierda Asturiana (IAS)** xunto a Los Verdes-Grupu Verde y el sector mayoritariu d'Andecha Astur, con **Ignaci Llope** como candidatu.



Militantes de la organización de mocedá formaron parte de les llistes de la coalición nes **trés circunscripciones** del territoriu asturianu y en **quince conceyos**.

Los resultaos qu'algamó la coalición fueron discretos, con **4119 votos**, siendo la quinta fuercia política a nivel asturianu; y **4 conceyales** repartíos ente Carreño, Piloña y Nava. Sicasí, teniendo en cuenta l'históricu electoral del nacionalismu asturianu y les torques que sufrió **Unidá** pa poder presentase y nel trescurso de la campaña, tamos falando d'unos resultaos qu'animen a la construcción d'una **alternativa real d'izquierda asturiana y verde** nun futuru próximu.

Conciertos de mias>> en Mieres y Piloña

mias>> participó activamente na campaña electoral, sobremanera en **dos conciertos** entamaos pola organización de mocedá nos que participaron dellos de los grupos más destacaos de la escena musical asturiana.

El vienres 11 de mayu, primer día de campaña, entamamos en **Mieres del Camín** el primer actu electoral de la candidatura d'**IAS-Asturianistes** nel conceyu. Tres la intervención del candidatu a l'alcaldía, Faustino Zapico, cuntamos cola presencia del

raperu **Arma X** y el grupu de hip-hop local **13 Palabras**, que dieron pasu a la música lletrónico d'**Huborge** y **Hugo Electro**. La mocedá mierense respondió a la nuesa convocatoria, enllenando'l pub **Mausoléu** de la villa.



El segundu de los conciertos celebrámoslu'l vienres 25 en L'Infiestu y sirvió como pieslle de campaña de la candidatura local d'**IAS-Asturianistes por Piloña**, qu'algamó un conceyal, y de la nacional d'**Unidá**. Nesta ocasión les actuaciones musicales corrieron a cargu de los grupos **Llangres** y **Skama la Rede**, xunto a les intervenciones polítiques de "**Allende**" (candidatu a l'alcaldía), **Germán Abad** (candidatu a la Xunta Xeneral pel oriente) ya **Ignaci Llope** (candidatu a la presidencia d'Asturies).



na rede >>

Asturianos contra Areces

Nel trescurso de la precampaña electoral, **mias>>** reaicionó al últimu inventu d'autobombu del presidente Areces, quien presentó una supuesta iniciativa ciudadana p'apoyalu n'internet baxo'l nome "Asturianos por Areces". La web de la organización, pura propaganda, resultó amás consistir nuna especie de panexíricu que fala del presidente y la so xestión nunos términos que rocen l'endiosamientu.

Énte esti despropósiu, dende **mias>>** entamamos una contracampaña na direccióin www.asturianoscontraareces.com, onde quiximos amosar una versión más realista de lo que vino pasando n'Asturies nestos años de gobiernu d'Areces y PSOE-IU.

movilizaciones >>

mias>> nel Día de les Lletres Asturianas

Mocedá d'Izquierda Asturiana tuvo presente esti vienres 4 de mayu, xunto a **Izquierda Asturiana** y **UNIDÁ**, na habitual manifestación pola **oficialidá** que convoca la Xunta Pola Defensa de la Llingua Asturiana con motivu del **Día de les Lletres Asturianas**.



Unes **2000** **persones** movilizáronse otra vuelta pa **desixir el tratu que merez la nuestra llingua**. Dende **mias>>** volviemos a recordar la **negación de derechos** que carecen miles de mozos y moces n'Asturies que nun pueden depender asturianu nos centros educativos. Vemos claro que, más alló del incumplimientu de lleis que suponen estos fechos, la solución pasa necesariamente por un fechu: **¡¡¡oficialidá agora!!!**

Contra la homofobia y la tresfobia

Mocedá d'Izquierda Asturiana y **Mocedá d'Andecha Astur** quixeron participar nel **17 de mayu, Día Internacional contra la Homofobia y la Tresfobia (IDAHOT)**, y hicieron un actu reivindicativu na bárzana de la Estación del Norte d'Uviéu, en mediu de la feria de L'Ascensióin,

onde encolingaron una pancarta con motivu d'esta fecha.



Na manifestación contra la tauromaquia

Mocedá d'Izquierda Asturiana participó'l sábadu 18 de mayu na **manifestación antitaurina** convocada pola organización **ANADEL** n'Uviéu con motivu de la corrida de toros programada dientro de les fiestes de **L'Ascensióin**.



En **mias>>** paeznos bien murnio qu'a estes altures entovía tengamos de movilizanos pola abolición d'un **"espectáculu" xabaz y denigrante** como son les corries de toros, qu'amás nun cuenten con nengún sofitu considerable ente la xente asturiano, sobreviviendo namás gracias a les **sovenciones públiques** col dineru de toos.

¡Corries de toros: festexu criminal!

cultura >>

Otru ataque de Gabino a les alternatives d'ociu n'Uviéu

mias>> vien d'amosar el so descontentu cola llinia d'actuación anunciada pol alcalde d'Uviéu **Gabino de Lorenzo**, dempués d'asegurar que diba entamar una "cruzada contra'l ruíu" **cancelando toles fiestes y conciertos** de

nueche na ciudá, sacante les de Samateo.

Dende **mias>>** consideramos qu'esta midida ye **escandalosa** y va significar otru golpe a la oferta cultural y d'ociu n'Uviéu, un conceyu que yá carez d'una programación de conciertos a l'altura necesaria, **obligando a los mozos y moces a buscar esti tipu d'actividaes n'otres ciudaes cercanes como Xixón** que disponen d'una cantidá d'alternatives y de locales que multipliquen les de la capital.

qué ye mias>>?

Somos un grupu de **xente mozo** que facemos por esparder una **conciencia crítica** colo que nos arrodiada dende una perspectiva **asturiana y d'izquierda**. La **Ecoloxía**, la **Xusticia Social** y l'**Asturianismu** son les exes de la nuestra actividá. Actividá que tien de ser fecha **por y pa la mocedá asturiano**, amosando que n'Asturies somos munches/os les/os que nun



tamos d'alcuertu col **modelu actual**, que nun vemos con bonos güeyos **"l'autonomía" ruina y emprestada** que nos "regala" l'estáu

español, que nun asumimos como igua al nuestro futuru la **emigración** obligada, nin la explotación de los **trabayos basura**. Que nun llamamos frente a la **discriminación sexista** que les moces tamos careciendo, nin a la implantación cuasi colonial de **multinacionales**, nin al esfarrape del **nuestro mediu ambiente...**

Trabayamos pa da-y al nuestro país **otra traza**, otru sentir. Queremos una Asturies **respetuosa col mediu, ensin xéneros**, que s'enfrente a la globalización del beneficiu pa cuatro, pa **mundializar los derechos** sociales y llaborales. Una Asturies arguyosa de la so **identidá**, de la so **cultura y llingua**, una **Asturies soberana**, dueña del so futuru y qu'apueste pola **democracia participativa** con una ciudadanía protagonista de les decisiones que-y afecten. Una **Asturies llibre**, onde la **opción sexual** nun seya torga pal desenvolvimientu social.

Queremos ser la mocedá que faiga por **otra Asturies**, la de la xusticia y la llibertá. **Ente toes y toos** vamos construyir l'**Asturies que vien**.

participa >>

Mocedá d'Izquierda Asturiana

www.mias.as >> mias@ias.as

Primo de Rivera, 1, Oficina 9. 33001 Uviéu.

